

Areglo di pensioen nobo tin un base solido cu perspectiva pa futuro



Na 2014 a traha e fundeshi pa un areglo di pensioen duradero y pagabel pa e empleadonan publico y esnan trahando na institucionnan y fundacionnan afilia na gobierno. E Acuerdo Bilateral entre Pais Aruba y e sindicatonan ta un logro importante cu a conduci na un areglo di pensioen nobo cu un base solido y cu perspectiva pa futuro. Asina mes cu tin e base solido aki, e fondo di pensioen lo sigui enfrente su retonan den e añanan cu ta bin. APFA ta raporta riba e desaroyonan den e di dos y tercer kwartaal di 2015.

Comienso nobo

E areglo di pensioen NPR 2014 a drenta na vigor cu forza retroactivo desde 1 di januari 2014. Entrante e fecha aki e grado di cobertura bruto a yega 100% door di pospone e pensioen acumula y door di un pago adicional door di gobierno y e otro dunadornan di trabou. A traspasa e derechonan di pensioen acumula te 1 di januari 2014 sin cambio den e areglo di pensioen NPR 2014, teniendo cuenta cu e edad di pensioen nobo. E acumulacion pa aña di servicio a baha desde di 1 di januari 2014 di 2,15% pa 1,75% y e maximo cantidad di aña pa acumulacion a subi di 34 pa 40. E franchise (e parti di e salario cu no ta conta pa pensioen) a subi di Afl. 14.059 pa Afl. 17.616. Den e areglo nobo gobierno no ta obliga mas pa haci pago adicional den caso cu tin un deficit financiero.

Un plan di recuperacion NPR 2014 pa termino largo

Door di a hisa e grado di cobertura bruto na 100%, NPR 2014 no tin un deficit den su cobertura mas. Cu esaki tin suficiente capital pa paga e pensioen awor y den futuro. Sinembargo Banco Central di Aruba ta exigi di e fondonan di pensioen cu nan ta mantene un reserva (weerstandsvermogen) pa cubri resultadonan financiero negativo. E grado di cobertura netto, incluyendo e reserva, mester ta 100%. 1 di januari 2014 e grado di cobertura netto di NPR 2014 tabata 93,7%. Pues ainda no tabatin suficiente reserva. Pa e motibo aki fin di juni di e aña aki e fondo a entrega un plan di recuperacion cerca Banco Central di Aruba. E plan di recuperacion aki ta describi e maneho cu APFA lo hiba pa yega na e nivel di 100% netto durante e periodo di recuperacion rekeri di 15 aña. APFA ta spera di alcanza esaki bastante prome cu fin di e periodo aki. Asina cu Banco Central di Aruba aproba e plan di recuperacion, APFA lo publica esaki riba su website.

Maneho di Inversion

Na 2014 APFA a hiba un maneho di inversion cu tabata dirigi riba recuperacion di e posicion financiero di e areglo bieu (NPR 2011) segun e plan di recuperacion cu tabata vigente na e momento ey. Mientrastanto e posicion financiero di e areglo nobo (NPR 2014) a cambia considerablemente. Basa riba e situacion nobo aki, APFA a bolbe evalua e maneho di inversion den e prome mita di 2015. E conclusion ta cu e maneho di inversion actual ta cuadra den e areglo di pensioen nobo. Pa e proximo periodo APFA tin como meta pa realisa un recuperacion stabil y minimalisa e probabilidad cu e grado di gobertura ta baha bao di e nivel rekeri.

Desaroyonan den 2015

Den 2015 e mercadonan financiero internacional ta hopi volatil. Pa APFA esaki ta nifica cu mester tene cuenta cu un mercado financiero internacional instabil y cu hopi reto, den cual e resultadonan di e inversionnan den exterior por fluctua considerablemente. APFA ta enfatisa cu pa un fondo di pensioen ta importante e resultadonan di inversion riba termino largo pa cumpli cu e obligacionnan di pensioen.

Na principio di e aña aki e posicion tabata positivo door di e bon resultadonan di inversion na 2014. Despues di realisa un resultado positivo den e prome lunanan di 2015, desde juni 2015 e desaroyonan riba mercadonan financiero internacional a resulta den un rendimiento negativo riba e inversionnan den exterior na final di e tercer kwartaal. Te cu september 2015 e rendimiento riba e inversionnan den exterior di APFA ta -1,4%. No obstante APFA su resultado tabata miho cu e promedio di e mercado. E rendimiento realisa riba e inversionnan total di APFA te cu e tercer kwartaal di 2015 ta 2,3%.

E caida di e mercado financiero internacional tabata tin su efecto riba e grado di cobertura. E grado di cobertura bruto di NPR 2014, cu na final di e prome kwartaal di 2015 tabata 103,4%, a baha den e tercer kwartaal te na 102,0%. Tambe e grado di cobertura bruto di NPR 2005 a baha te na 117,6% na final di e tercer kwartaal.

Te cu awe e desaroyonan riba e mercado financiero internacional den luna di oktober ta indica un recuperacion.

APFA ta remarca cu den su vista e resultadonan aki no ta duna motibo pa adapta e plan di recuperacion y no tin efecto riba e pensioen di su participantenan.

E cifranan nucleo

NPR 2014	30 september 2015	30 juni 2015	31 december 2014
Capital di pensioen	Afl. 2.524 milyon	Afl. 2.541 milyon	Afl. 2.512 milyon
Provision obligacion di pensioen	Afl. 2.474 milyon	Afl. 2.464 milyon	Afl. 2.442 milyon
Grado di cobertura bruto	102,0%	103,1%	102,9%
Grado di cobertura netto	94,9%	95,7%	95,6%
Prima di pensioen	16,6%	16,6%	17,7%
Participante	6.334	6.297	6.194
Pensionado	4.416	4.312	4.316
NPR 2005			
Capital di pensioen	Afl. 12,6 milyon	Afl. 12,0 milyon	Afl. 10,6 milyon
Provision obligacion di pensioen	Afl. 10,7 milyon	Afl. 10,2 milyon	Afl. 9,0 milyon
Grado di cobertura bruto	117,6%	118,2%	117,9%
Grado di cobertura netto	109,4%	109,7%	109,6%
Prima di pensioen	29,3%	29,3%	28,8%
Participante	322	326	324
Pensionado	21	18	18

Reunion general

APFA lo presenta su relato anual 2015 na su participantenan y pensionadonan durante e reunion general cual lo tuma lugar den e ultimo siman di november 2015. Lugar, fecha y orario lo wordo anuncia despues.

